

冲庵顧先生撫遼奏議

冲菴顧先生撫遼奏議卷之十九

通州 益卿顧養謙著

疏

屬夷擒斬逆酋獻送被虜人口乞賜職銜
題為屬夷擒斬逆賊首級獻送被虜人口乞

恩加賜職銜約束東夷永固藩籬事查先據分守
遼海東寧道兼理邊備山東布政使司右叅政
栗在庭呈據建州左等衛朝

貢夷人馬三非等齎執夷酋奴兒哈赤番文稟帖

赴道日開建州左等衛朝

貢夷人都指揮
李產失哈賊首李董剛張伯失脫命逃回再挈
綁送又賊首王杲脫命逃走祖父領兵各處追
趕挈住從開原綁送賊根阿台與我為讐又怕
阿台走了

天朝教我祖叫場在阿台家誘哄我父塔失領

天朝兵馬圍住阿台寨子将我祖父一同殺了六年
夷人不安我年長三十歲將讐夷殺了平安今
方得朝

貢李董剛王杲大搶日夜報知聽得賊首殺了漢

人歸送從撫順送進漢人金銀哥等五名從清
河送進于木匠從撫順送進李胡子韓得和徐
尚德張四兒又送撫安堡牛三隻轡頭一副清
河牛三隻俱有案驗存照我領三十二名頭領
保守邊界討要賞賜陞職管束東夷屢年朝

貢出力等情到道看得兩關并建州等衛夷人先
年俱係都督王台管束各効忠順後王台病故
子孫懦弱日被北關侵陵殊費調停近奴兒哈
赤長壯兼以部夷歸心管束建州毛憐等衛一
帶夷人俱知畏服送人口及貢令建夷五百

名見今陸續點是

貢今稟討陞職管束夷人一節緣本夷原係都指揮之職伊祖伊父先為領兵鄉導剿除王杲後死於阿台之巢誠為有功且本酋不敢懷父祖被殺之恨又不敢從北關逆虜之謀朝貢依期永堅効順委應奏

請加以都督職銜改給

勅書以示羈縻庶屬夷益知感勸邊疆永保無虞矣等因到臣會議間又據整飭開原兵備山東布政使司右叅政成遜呈審得建州衛屬夷冬哥

與先逃往建州今被奴兒哈赤斬獻賊酋克五十并在官跨兒答及先掣獲監故納失卜咬合歹都等向在中固城迤東柴河堡邊外地名木札河沿河住牧因見南關都督王台強盛即投南關後王台病故其子猛骨孛羅等衰弱又因兩關不和復叛歸建州往來叛服不常克五十與冬哥跨兒答歹都等商議會同帶領馬步達子五十餘騎於萬曆十六年五月二十七日寅時從柴河堡黑鷹窩臺北空進入該臺舉放砲火先未被賊殺死于堡指揮劉芥一面差人赴

城走報一面帶領馬步軍兵出堡追趕克五十等徑奔目牙鎮屯竄擄沈效忠等牛糧於本日辰時仍從來路出境時有中固備禦宿振文開原叅將吳希漢各聞報統兵追趕據報賊已出境各回城堡劉斧據督屯旗甲崔奉稟稱前賊是木扎河住牧建州夷人克五十等搶掠劉斧即於本日午時帶領馬步軍士踏蹤從本臺出境追趕離牆一十五里至地名稗子峪撞遇克五十與冬哥等各持弓刀向前射斫死官軍劉斧宋景等九員名射傷軍士小周奉等三名陣

失宋景等官馬三匹各賊回寨已知射死劉斧
恐懼大兵征剿各逃散後見事緩復來木扎河
照舊住牧隨該宿振文將前失事及宣諭猛骨
孛羅奴兒哈赤各稱不係所管夷人情由具呈
叅將吳希漢通呈蒙巡按許御史詳批賊射死
劉斧等不可不為之剿也兩處不認將何以處
之開原道查報又蒙巡撫顧都御史詳批此不
過零竊耳守堡官何至輕出被殺該道即查劉
斧及軍士被殺緣由地方有無失事重大夷人
克五十的係何酋部落應否責令何酋緝獻或

發兵剿處通查議明妥報奪備蒙牌行遼海衛
經歷杜進孝查勘間又蒙巡撫顧都御史憲牌
據本道稟稱通事高應魁回稱歹商猛骨孛羅
等說克五十等賊見在建州奴兒哈赤處乞行
撫順備禦就近宣諭奴酋將克賊解送據此看
得逆賊克五十素為邊患近又殺死守堡官員
罪不容誅合行設法擒拏除行分守道并撫順
備禦官選差的當通事人役密切宣諭奴兒哈
赤擒拏外牌仰本道即便備行備禦王汝徵選
差的當通事人役密切宣諭猛骨孛羅舊年不

學好要革你龍虎將軍近日悔過容汝朝

貢今逆賊克五十潛逃各處未否果在建州你若
能緝獲擒綁送進益見忠順照舊龍虎將軍仍
加厚待若奴兒哈赤挈獲解來便見奴酋有為
即題

請奴酋陞授都督仍加號龍虎將軍中間軒輊機權
該道與王汝徵留意圖之等因蒙此行據備禦
王汝徵呈本年七月內猛骨孛羅將克五十納
失卜咬合三名挈綁解送間說裏邊因你殺了
守堡教我綁進有克五十聽聞畏罪在寨夜黑

脫逃建州去訖止將納失卜咬合二名差令部
夷三漢綁送前來王汝徵審係正賊監候擒拏
克五十等轉解間納失卜咬合原與劉斧遇敵
傷重在監病故本官復差通事高應魁等密切
宣諭猛骨孛羅歹商查要賊首克五十冬哥等
猛骨孛羅將冬哥與歹都跨兒答三名擒獲差
部夷栢羊戶失等綁送前來其未獲克五十來
夷說稱逃往建州去訖猛骨孛羅已差部夷那
刻等前去向奴兒哈赤討要來日另送先將冬
哥等呈解本道詳審蒙批仰再審明確解報本

官隨將冬哥與歹都跨兒答復令通事高應魁
再審冬哥與跨兒答等各供原與克五十等進
搶柴河堡地方將守堡官殺死等情先將冬哥
等呈解其克五十逃往建州仍行撫順備禦官
宣諭奴兒哈赤務獲正身綁獻緣由呈解本道
詳審間歹都在監病故將冬哥等問罪招解到
臣批候類

題間又據分守道右叅政栗在庭呈為邊情事蒙
本院憲牌依蒙行據撫順備禦張三畏稟據通
事董國雲并奴兒哈赤差來部夷鎖失狼頭等

到驛稟說有作歹夷人克五十克數兄弟二人
逃來建州地方躲住我奴兒哈赤遵聽宣諭本
年十月二十七日捉拏二賊殺死埋董國雲
親到屍所驗看是的該本道看得奴兒哈赤近
日學好遵聽宣諭將逆賊克五十克數殺死忠
順可嘉似應題

請加陞都督管束建州諸夷等因具呈本院蒙批據
稱奴兒哈赤殺死克賊兄弟埋在他通事董
國雲親到屍所驗看是的似亦可信但奴酋既
力能擒綁二賊何不即行解獻以自明其功而

殺死掩埋之恐無是理董國雲與克賊兄弟非
親識也死屍何以辨其為真近來本院於諸屬
夷則不忍殺將士之功則不敢攘以為己功議
者猶有遼陽故智之疑况事在虜中尤影響而
難憑者乎關係題

請未可輕議該道仍再加詢訪及移文開原道多方
查實詳奪萬一克賊尚在吾輩干係豈小也此
繳蒙此移文開原道責差通事同撫順通事出
境辯驗間萬曆十七年二月初五日又蒙本院
憲牌備仰本道即行撫順備禦官選差精細通

有司具奏
事官員宣諭奴兒答赤先年汝祖汝父俱係忠
順屬夷近年汝亦學好撫鎮二堂所以許汝
貢市領賞即開原海西諸酋俱是屬夷為我藩籬
中國相待俱如兒女一般海西既不得侵犯建州
建州亦不得陰謀海西其克五十如果尚在即
行綁獻本院即與具

題陞為都督總管東夷必不食言等因蒙此行據
撫順備禦張三畏呈稱克五十殺死是的屍首
難辨緣由具呈本道詳批克五十屍首既不能
辨驗真偽果伊妻見在猶可問而知其詳也仰

張三畏作速索取伊妻及首級解道仍令開原
通事高應魁并馬三非親赴聽審以憑轉解繳
張三畏復令通事董國雲等宣諭去後本月十
八日據通事董國雲張隆等并夷人馬三非回
稟奴兒哈赤令張隆等到克五十屍所取出用
水洗淨遍驗是的具呈本道蒙批克五十既殺
死是真必須割取首級及伊妻解道轉解撫院
方為的據繳續據本官呈稱又差通事董國雲
等出關備將恩威詳加宣諭奴兒哈赤於三月
初三日將叛賊克五十首級割取并伊妻非央

公及漢字一紙差部夷莫牛馬三非等跟同董國雲等送進審據非央公夷語供說有克五十存日作歹投奴兒哈赤寨內過日子他知我的漢子不是好人拏住殺了是實看得奴兒哈赤將克五十首級及妻獻送據迹揆心其効順可知但求賞乃犬羊之性有不得不給者而馬三非又有三十二箇頭領俱當犒賞之稟必奴兒哈赤素有此意其在今日似亦不可拂其心也緣由連人并克五十首級呈解到道備審克五十妻非央公所供相同又據馬三非齎投奴兒

哈赤漢字稟帖一紙計開隣邊保守夷人三十
二名各衛之主奴兒哈赤并速兒哈赤等三十
二名乞賞等情該本道看得奴兒哈赤殺死叛
酋克五十解驗首級并伊妻非央公活口可據
情甚真的忠順可嘉似應題

請加陞都督給與應得

勅書管束東夷其速兒哈赤等三十二名皆係屬夷
頭領保我遼疆委亦効勞有功合無每夷量賞
中段一疋牛一隻鍋一口鹽五十斤猪二隻其
奴兒哈赤賞賜衣服段疋牛隻等項另候裁示

使各夷永堅効順固我藩籬等因通呈蒙巡撫
顧都御史詳批據解克五十首級初尚疑其非
真及令中軍官張世爵將馬三非等關閉空室
吊開原道先解賊夷冬哥跨兒答與非央公面
審二夷一見非央公即指為克五十之妻非央
公亦熟識二夷而開原通事張隆則認克賊首
級甚的非央公供其夫曾殺守堡官甚明此事
已無可疑者矣奴兒哈赤聽我宣諭擒殺賊夷
遠獻其級委為忠順可嘉加陞都督給

勅管束東夷等事候即題

請除本院已給賞外該道再給賞鍋十口鹽一百斤
布五十疋其速兒哈赤等三十二名俱如議給
賞首級仍解按院一驗可也此繳又蒙巡按徐
御史詳批克五十首級驗訖即非央公供可據
也該道費盡心力今果如願其功不小奴兒哈
赤忠順可嘉候會

題陞賞其速兒哈赤等賞勞等物俱如議行候撫
詳繳等因備呈到臣除將射死守堡官軍劉斧
等并綁獻賊夷冬哥等及斬獻克五十首級併
入十六年終類報獲功本內已於萬曆十七年

四月十五日具

題聽巡按御史覈勘外今行准鎮守寧遠伯李成
梁手本行據坐營中軍吳嗣勲呈據通事官佟
惟動等查得奴兒哈赤乃叫場之孫塔失之子
先年叫場塔失皆忠順為

中國出力先引王台拏送王杲後杲男阿台將叫
場拘至伊寨令其歸順合黨謀犯以報父讐叫
場不從阿台拘留不放大兵征剿阿台圍寨攻
急塔失因父在內慌忙救護混入軍中叫場寨
內燒死塔失被兵誤殺因父子俱死蒙鎮守李

總兵將塔失屍首尋獲查給部夷伯挿領回又
將寨內所得

勅書二十道馬二十匹給領今奴兒哈赤繼祖父之
志仍學好忠順屢次送進漢人一十三名口今
萬曆十六年五月內賊酋克五十竊犯柴河堡
射死守堡指揮劉斧蒙巡撫顧都御史牌行分
守栗叅政差通事宣諭奴兒哈赤即將克五十
斬首獻進見今驗馬朝

貢及查奴兒哈赤祖叫場原領

勅書係都指揮使今又送進人口且建夷歸心聽彼

約束合無破格題

請加陞都督職銜改給

勅書以彰

中國之恩緣由呈報前來據此為照建酋奴兒哈
赤祖父叫場塔失皆忠順購擒王杲獻送正法
尤見宣力且又死於兵火今奴兒哈赤繼祖父
之志効順益堅進送人口足徵向化之誠斬獻
逆夷尤見除惡之績此夷酋中之慕義者功有
足錄情有可憫東夷俱願約束似宜破格
題陞不惟有以示勸而激勵諸夷亦駕馭犬羊保

固藩籬之一策也等因到臣臣會同總督薊遼
保定等處軍務兼理糧餉都察院右都御史兼
兵部右侍郎張鎮守總兵官太保兼太子
太保寧遠伯李成梁巡按山東監察御史徐元
議照屬夷之為我藩籬舊矣制馭之策不出乎
撫剿

恩威臣等鄉者嘗言之矣顧撫剿

恩威之所加在得其要領而已所謂要領者因其勢
用其強加之

賞賚假以名號以夷制夷則我不勞而封疆可無

虞也遼左西自山海東抵開原千二百里之間則朶顏三衛之夷歲糾西北二虜為患此遼之所以急也是三衛之夷不得稱為遼左屬夷明矣惟自開原東北南抵鴨綠江透蛇八百餘里環東邊而居者則皆女直之遺種皆遼之屬夷也所謂東夷者也然今之呼女直者凡三種其一曰海西女直則故王台之屬今開原南北兩關之夷是也其一則東方諸夷之為衛所甚衆而建州領其名曰建州女直今奴兒哈赤之屬是也其極東曰野人女直野人女直去遼遠歲

因海西入市於開原雖不入

貢而亦不為邊患先是海西王台強能得衆稱開
原南關酋北收二奴南制建州終其身向化而
東陞以寧是時東夷之勢在王台故聽之襲其
祖速黑忒左都督之職以長東夷而萬曆三年
以擒獻逆酋王杲故奉

旨加授勲銜與其二子俱為都督

賞以金幣特優已又視西虜例加授龍虎將軍蓋
台之忠固有足嘉實由我

皇上神機遠覽得其要領不惜

賞賚名號之加而鼓舞之以作其忠也及王台死而勢分逞仰二奴稱雄於北奴兒谷赤稱雄於南且各恃其強而甘心於王台之後王台之後不立則撤我藩籬而封疆多事矣故前此在事之臣力

請誅二奴以安王台之後王台長子虎兒罕者左都督也又繼台死其子歹商襲父職而守忠順之業北關二奴誅而其二子那卜二酋者報父怨逆狀益著王台之後妻溫姐則二奴妹也有子猛骨孛羅最少而襲王台之職為左都督稱龍

虎將軍台之孽子康古六長而妻其後母溫姐
溫姐與康猛兩酋名為南關夷並以北關親故
內為賊而甘心於歹商竟附北關而俱叛奴兒
哈赤又將連姻北關而侵歹商諸酋以是故不
入

貢凡五年矣是開原屬夷之內向者惟一歹商耳
王台忠順之後其不絕蓋如縷矣使歹商不立
而南北諸酋合則開原必危故臣等以存歹商
故寧議誅那卜並處康猛溫姐而且及奴兒哈
赤矣及大兵一臨撫剿互用而那卜二酋降康

酋溫姐死猛酋勢孤與那卜並和歹商而請入
貢奴兒亦畏威罷北關姻姻歹商而首先入
貢矣夫諸酋既轉逆而為順則我不得不易剿而
為撫威畏

恩懷藩籬可復不盡用吾力而示我有餘則不如罷
兵而省勞費之為便臣等是以具狀上

聞請罷兵以善其後今諸酋之

貢則皆入矣歹商以

中國得立於諸酋之間襲其父都督而長海西無
論已猛酋亦擒獻逆賊款服如故則名號亦當

如故矣那卜二酋父並以逆誅法不得襲父職
為都督必俟其後有功勞特

請與之然第不敢聞之內耳未嘗不竊假名號以束
其部夷是海西諸酋各自為雄勢不相下而我
易為制開原之事已大定矣惟建州奴兒酋者
勢最強能制東夷其在建州則今日之王台也
既屢送回被虜漢人且及牛畜又斬犯順夷酋
克五十獻其級而慕都督之號益切則其內向
誠矣及查其祖父父又以征逆酋阿台為我居
間鄉導並死於兵火是奴兒哈赤者蓋世有其

勞又非小夷特起而名不正者也查得

大明會典內一款建州毛憐三大衛夷人如有送回
搶虜男婦者止許給賞不願賞者量陞千百戶
指揮存留都督名色以待能殺犯順夷首及執
縛為惡夷人與報事引路殺賊有功者此

盟府之典用以信外夷而安封疆者也若錄奴酋父
祖死事之功即當時與之都督亦不為過而斬
獻逆酋之級則又與

明例合矣伏乞

勅下兵部查例酌議將奴兒哈赤加陞都督職銜改

給

勅命使制東夷為我藩籬此東陞之要領也東陞既
安可無復煩兵而一意西防又全遼之大畧也
不可失也為此具本謹題請

旨

瀋陽缺遊擊

題為缺官事據分守遼海東寧道兼理邊備山東
布政使司右叅議傅霖呈稱管瀋陽遊擊事叅
將劉言於萬曆某年某月某日病故等因到臣
臣會同總督薊遼保定等處軍務兼理糧餉太
子太保兵部尚書兼都察院左副都御史張
鎮守總兵官太保兼太子太保寧遠伯李成梁
巡按山東監察御史陳登雲議照瀋陽近數中
虜為遼左最衝之區今遊擊劉言病故正當收
穫秋防戒嚴將領時不可缺查得管開原備禦

事加銜叅將霍九臯智周料敵勇足冠軍收二
奴已著勲勞督兩市能消禍變領兵遊擊楊元
謀勇相資廉靜有槩能常守乎義訓可不媿於
科名以上二員俱堪推補瀋陽遊擊若用霍九
臯遺下員缺又查得廣寧備禦吳希漢署篆不
苟總哨有為警敏而識機宜驍勇而多斬獲鐵
嶺備禦暮承勲老練之才謹飭之守防禦安於
磐石修建固於金湯以上二員俱堪調補開原
備禦若用吳希漢遺下員缺又查得瀋陽中衛
掌印東寧衛指揮同知王容臣才識通明操持

謹索素有勇敢之氣常懷忠義之心遼海衛管
局本衛指揮僉事胡一中立志不群負氣甚銳
管局不私物料司捕甚得人心以上二員俱堪
陞補廣寧備禦如蒙

勅下兵部再加查議將前項員缺即以霍九臯等酌
量推補庶地方得人而秋防有賴矣為此具本
謹題請

旨

請加副將李興府銜

題為懇

恩俯賜府銜以隆優卹事據遼海東寧道兼理廣寧
兵備山東按察司副使鮑希顏呈蒙臣案驗依
蒙行據坐營中軍吳嗣勲呈揭查得李興自幼
跟隨主將由瀋陽寬奠遼陽副總叅遊隨任鋒
前敵虜當先不計外自隆慶五年四月十七日
跟隨鎮守李總兵在中左所斬首一顆本年十
一月二十四日在清河堡斬首一顆隆慶六年
三月初四日在金線塔斬首一顆十一月初一

日在舊遼陽斬首一顆萬曆元年三月二十一
日在鎮西堡斬首一顆九月十一日在太興堡
斬首一顆十二月十七日在中遼河斬首一顆
萬曆二年十月初十日在東州斬首一顆十一
月初九日在舊遼陽斬首一顆萬曆三年正月
二十三日在遼河西岸斬首一顆十一月十八
日虜衆入犯平虜堡與賊對敵斬首一顆萬曆
四年三月十八日在大清堡大青山斬首一顆
萬曆五年三月十五日在鐵嶺鎮西堡邊外北
羅兔斬首一顆五月初九日在大勝堡斬首一

顆本月二十六日在鎮靜堡斬首一顆萬曆六年正月十九日在丁字泊堡斬首一顆以上共一十六顆俱報願賞本年六月初八日在鎮靜堡斬首一顆十二月十七日在養善木斬賊首把兒度一顆萬曆七年十二月十七日在紅土城斬首三顆萬曆八年三月十三日在鴨兒匱斬首一顆十月初三日虜衆入犯錦義地方在陣斬首一顆以上共計九顆報陞授職訖萬曆九年正月初九日虜賊入犯錦州城在陣斬首一顆二月十九日在襖郎兔李興督兵累當鋒

前驍雄素著戰陣馳名題加備禦職銜萬曆十年三月十八日在鎮夷堡殺速把亥驍健超群叱咤破虜殄滅元兇李興數人之力更多題加遊擊職銜四月初三日李興領銳兵從大清堡出境至地名大青山斬首四顆生擒達賊一名額參兔九月二十三日曹子谷領部兵斬首五十六顆萬曆十一年正月二十六日虜衆入犯瀋陽督率部下斬首二十七顆二月初二日在古勒寨督部斬首一百四十九顆李興躬冒矢石不避艱險義急同舟忠期共濟與曹子谷捷

功併加叅將職銜十二月初四日在開原督部
斬首九十五顆本月二十二日虜衆入犯瀋陽
蒲河手刃二顆萬曆十二年三月十九日大康
堡邊外卜剌哈兔督部斬首三十顆萬曆十三
年三月十七日在丁字泊堡境外地名打大督
部斬首五十七顆萬曆十四年二月二十五日
鎮邊堡邊外地名可可毋林督部斬首四十一
顆李興首先破虜身被大創幾至捐軀題加副
總兵職銜六月十七日虜衆入犯高橋鋪督兵
斬兇賊一顆九月十八日虜犯錦州督兵又斬

首一顆萬曆十六年三月內奉

命征討那卜二酋督兵當先攻打堅寨矢石不避首倡士氣督部斬首三十七顆二酋畏威降服功尤首稱陸續蒙受

欽賞一十四次薦獎三十三次本年七月二十二日病故及查李興節次功績手刃賊級共二十六顆內賊首一顆督部斬級共四百九十九顆血戰久勞於鋒鏑防禦極力於邊圉積傷切骨癰疽發面醫藥未效一旦身歿計功所當旌揚之嗣尤可軫隱似宜題

請卹錄緣由到道看得加銜副總兵李興起自我行
赤心報

國勲閼樹於塞上忠勇著於師中不十數年陞級
都閫加銜副總可謂遼左一驍將矣奄爾死於
牖下絕無子嗣家且甚貧計其勞績誠不可泯
合無俯賜會

題量贈府銜仍優卹其家以慰忠魂為邊臣有功
者之勸等因呈報到臣據此案照萬曆十六年
十一月初十日准兵部咨該閫視遼鎮巡按山
東監察御史許守恩題前事該本部覆議李興

督撫官題

請優卹等因題奉

欽依備咨前來欽遵已行分巡道查議去後今據前
因臣會同總督薊遼保定等處軍務兼理糧餉
都察院右都御史兼兵部右侍郎張議照
副總兵李興者本寧遠伯李成梁養子也勇冠
三軍起家百戰戰輒中大創輒斬首虜以歸其
初率以

賞既用有家矣乃願陞累陞而至今官然平生死戰
皆不死而死以疽疽發頭面慘甚以去年七月

二十二日死年四十有二耳前一日臣等使人
遺金經紀其後事興哭則無淚第據牀作叩首
狀曰無能報矣柰何不令我灑血沙漠而死牀
第也其壯尚如此既死籍其室中徒有鎧甲弓
刀鞍馬甚具而負責以千金不能償蓋興嘗養
死士五十餘人馬五六十匹而諸人又各有妻
子凡百五六十人不食於官而衣食芻豆悉仰
給興興平生所得

賞金及諸人首功之

賞悉以供之不給又稱貸而益之故竟負責千金至

死而不能償也又止遺二女而無子即又無近
屬弟姪可襲其世官者臣等是以愈益憐之然
臣等非表其能廉而以其身効死又能養死士
以報

國竟暴死且貧而無後可錄之為可念也今蒙
皇上特發溫綸令臣等題

請優卹興已死有餘榮且不朽矣他無例可援惟有
加府銜之議似為可從若卹其寡妻二次則撫
鎮二臣之事而不敢以瀆

聖恩也伏乞

勅下兵部再加酌議將副總兵李興稍加府銜以慰
忠魂而勸來者九邊將士聞之當無不願效死
以報

皇上者矣為此具本謹題請
旨

衝邊危困請發原額行糧

題為目擊衝邊危困

請發原額行糧以救然眉仍乞

聖恩定為年例以永保無虞事據分巡遼海東寧道
兼理廣寧等處兵備山東按察司副使鮑希顏
呈蒙臣案驗依蒙行准寧前兵備僉事王邦俊
手本回稱查得領兵營今改中右所遊擊營原
有客餉銀一萬六千兩并部發銀一萬八千兩
共三萬四千兩原備三營四千修邊軍士行糧
支用後將一千營調隨廣寧正兵營分去銀八

千五百兩止剩銀二萬五千五百兩以新改西路協守營中右所遊擊營客兵軍馬三千名匹照例每年半全半減支給不足之數以迯故者扣除攤放足穀支用蓋管糧衙門每年分發客餉原非註定某營若干惟以全遼酌量隨時分發此縮則彼盈總計全遼分發之數可知矣今停止客餉銀一萬八千兩不止寧前二營告困即全遼皆稱不足惟寧前二營為急故首事告匱今欲知餉之盈縮惟在移會管糧衙門於解運全鎮年例客餉額數并每年分發各處數內

通一計筭便見本道止知寧前分發之不足不知何處之有餘難以計筭及照二營兵馬縱使半全半減皆足照月給放尚難自贍况半全半減又不足照月放給誠為危急等因又准戶部管糧郎中周文卿手本回稱查得一千營兵馬原議在防修邊工行糧銀一萬八千兩數內支給及查防修邊工銀兩自

題發年分為始至今十六年止節年照數分發寧遠庫支放其一千營兵馬調隨廣寧正兵營團練彼時各軍乾銀向未明白分析槩以年例銀

內通融放支以至相沿至今查得萬曆八年歲
入客餉共該京運銀一十萬二千五十八兩九
錢五分歲出共放過銀一十萬五千九百五十
三兩八錢六分零九年歲入客餉共該京運銀
一十萬二千五十八兩九錢五分歲出共放過
銀一十萬四千二百七十三兩八錢零十年歲
入客餉除停發本年下半年新覓家丁行料草
銀一千八百八十五兩二錢七分五釐外實該
京運銀一十萬一百七十三兩六錢七分五釐
歲出共放過銀一十萬三千五百八十八兩四

錢零十一年歲入客餉并加增寧前等處義兵
下馬竹料草共該京運銀一十萬二千六百八
十九兩四錢歲出共放過銀一十萬七千三百
二十一兩八錢零十二年歲入客餉共該京運
銀一十萬二千六百八十九兩四錢歲出共放
過銀一十一萬五千九百八十二兩一錢零十
三年歲入客餉共該京運銀一十萬二千六百
八十九兩四錢歲出共放過銀一十一萬一千
九百九十九兩零十四年歲入客餉共該京運
銀一十萬二千六百八十九兩四錢歲出共放

過銀一十萬二千二百一十六兩四錢零十五年歲入客餉并加增降夷花潯才等什糧料草共該京運銀一十萬五千二百二十三兩八錢歲出共放過銀一十萬四千六百一十兩零十六年歲入客餉共該京運銀一十萬五千二百二十三兩八錢歲出共放過銀五萬七千九十七兩零比因年終未銷以致流入實在銀四萬八千一百二十六兩八錢零以上京運銀兩歲入照奉

題增多寡額有定數其歲出原來那下補上兼之

加放閏月并設防閱視家丁馬匹等項據各道
放數流筭未嘗拘定一年支一年之用內歲出
多於歲入緣此項各道俱有還官銀在內茲亦
未分別另項也大都遼東客餉止有此數向來
通融支給原未分析其一千營兵馬原議防工
銀內支給既今見在年例銀內通融支用則寧
前分發數減前銀名雖互異而其實即係掣回
寧廣矣今有節年分發之數可以互查等因又
據代廣寧通判事加銜遊擊王善政呈稱依蒙
會同坐營中軍吳嗣勲查得萬曆六年六月內

該前巡撫都御史周

題

准一千營千總李元善一枝兵不滿千且官非將領
不便彈壓掣回廣寧聽鎮守寧遠伯李成梁整
飭簡練以備東西調遣蒙將一千營原調錦義
海州遼陽瀋陽寬奠開原等城堡兵馬分發選
鋒左右中三營團練征操萬曆十四年該督撫
題

准將正安營家丁四千五百名內河東舍餘家丁每
名每年加餉銀七兩二錢河西舍餘家丁與兩
河選鋒軍士四千名通融每名每年加餉銀三

兩六錢前項一千營軍士係選鋒四千名之內
俱自萬曆十五年正月月起按月加給係加餉之
數並不係行糧乾銀及本等月糧名色原無重
支緣由各回報到道為照西路協守中右遊擊
二營駐劄寧前一千營分隸廣寧俱係河東河
西各城堡軍丁均為客兵錢糧委應一體支給
第寧前駐劄二營兵馬止防本地應支行糧故
原議有半全半減之例一千營兵馬既調隨廣
寧正兵營內練為選鋒東征西援殆無息肩之
期故與原營選鋒一體全支行糧近又

題加餉銀三兩六錢無容別議合無將今准改軍
餉銀一萬八千兩載入年例聽管糧衙門將本
鎮原額客餉每歲通融分發庶人情事體均屬
妥便等因到臣又准鎮守寧遠伯李成梁手本
回稱相同據此案照萬曆十七年七月初一日
准戶部咨該巡按山東監察御史徐元題前事
該本部覆議看得巡按遼東監察御史徐元題
稱防修邊工行糧銀一萬八千兩原議工完停
止仍留駐防要將前項行糧速為補給仍載入
額餉一節為照寧前一線之路虜人出入無常

前項修邊之軍既改為常守則前項修邊之銀即當改為軍餉緣該鎮向未請明以致本部難於題發已經咨行查議未報今巡按御史徐元親歷其地據軍士迫切之情特為具

奏相應依擬但事係干軍餉必須督撫查覈明實議有定額庶便議覆增入年例合候

命下本部移咨薊遼總督會同遼東巡撫都御史即查領兵營原有客餉年例銀一萬六千兩併部發銀一萬八千兩共銀三萬四千兩原備三營四千修邊軍士行糧支用其一千營既調隨廣

寧正兵營分去銀八千五百兩止剩銀二萬五千五百兩以半全半減例計算每年每軍該銀八兩五錢七分五釐七毫前銀委否足以支放不足之數於何通融處補及查一千營既改為正兵近該督撫會題將正兵營軍士四千五百名係河東者每名加銀七兩二錢係河西者每名加銀三兩六錢共加銀二萬三千兩本部每年照數題發則前分去銀八千五百兩似屬重冒應否仍撤回寧前以補不足之數逐一查議停妥會題前來以便覆

請增入年例永為遵守等因題奉

聖旨寧前軍士既常川防守原支修工行糧准改軍
餉隨年例給發督撫官還上緊查明實數具奏
欽此欽遵備咨前來煩為查照施行等因又准
軍門咨同前事准此已經備行分巡寧前二道
移文管糧郎中周文卿及手本鎮守總兵官寧
遠伯李成梁查議去後今據前因又接得戶部
尚書宋 手書謂常守之軍歲支行糧恐不
可為例欲就此一萬八千兩之銀或以雙糧為
名外量再加行糧銀若干縱有追征出塞之苦

免行再議此真老成長慮為孤陞計久遠所謂
純忠體

國者也該臣會同總督薊遼保定等處軍務兼理
糧餉都察院右都御史兼兵部右侍郎張

議照寧前調操二營軍士其苦楚之狀按臣
中言之詳矣歷年

題發修工銀一萬八千兩今已奉

旨改入額餉無容議矣惟是遼鎮主客餉銀並屬不
敷徃徃預支半年每歲京運客餉到日除修工
銀一萬八千兩原係寧前調操軍士之餉別為

一項悉發寧前其全鎮客餉聽管糧卽中視緩
急通融分發不足則皆不足原不能處處取盈
寧前安得歲有客餉八千五百兩隨一千營兵
撥發廣寧也但廣寧既增兵一千則管糧卽中
分發客餉之時自稍損益於二道之間而實未
嘗執八千五百之數別立一項名色也不過總
於客兵項下支銷耳且一千營兵原係兩河調
操人數歲有踐更故練為選鋒則與原營選鋒
一體支給行糧近復加餉則一體加餉處之不
為不厚並無重複冒支卽有冒支近日部道諸

臣查發侵餉之姦不遺餘力安肯容之今歷年
出入之數具在管糧卽中季報歲報之數具在
本無不明者也其入數常少而出數常多則可
知餉本不敷之故也而發出實數竟常多於收
入實數者則歷年有迯故還官相兼支放之故
也然自一年出入之數而言之若為有羨而實
預支下年故謂之不敷也此所謂出入實數本
管糧卽中之事而臣等亦得與聞者也若寧前
客餉一萬八千兩之當議其說雖始於卽中周
文卿自兩年不發而二營之軍頗急周文卿亦

知其必不可裁每分發時未嘗不與臣面議稍
減他道之餉而發之寧前使二營之全支減支
如故是兩年之間太倉雖留餉一萬八千未發
而管糧卽中實未嘗裁其分毫也雖為移緩就
急之計實有掣襟露肘之虞年復一年他處必
又有告急者矣臣等以為十六十七二年修工
銀數仍當一體補發以免他處之急者也再照
二營軍士近雖分有信地常守寧前而實踐更
如故一役而二人分為兩班者也其赴班寧前
者以其遠戍也故得食行糧於寧前更番回伍

者即截日住支矣若定為雙糧名色新乎耳目
則兩班軍士必有一體雙糧之告擾且啓邊軍
比例告擾之端不如仍舊不動聲色之為便伏
乞

勅下戶部查議

題覆將二年未發修工銀兩照數補發不復另立
修工名色悉入年例客餉之內聽管糧郎中與
撫臣計議通融分發其調操寧前二營軍士惟
赴班寧前者得食竹糧每年半全半減如故雖
有出塞追征之勞不得覆議行糧斯則額餉清

而人心亦定矣為此具本謹題請

旨